

Segun Bibi Arends coordinador Lighting Parade

Pa falta di boluntad pa paga gastonan di e parada, lighting parade a wordo poni na disposicion di SAC

Den e reunion di dia 8 di februari ultimo, teni na sede di SAC, entre e lidernan di grupo y e coordinadornan di lighting parade encunto cambio di direccion dje parade, tambe a wordo discuti e contribucion y destinacion di e gastonan di e paradanan. Esta di pa lighting parade (pa cual ta wordo pidi un contribucion) y e fakkel cu ta un fundraising parade pa e gruponan. E organisadonan a splica ampliamente e meta di e lastlap band y e apertura di e paradanan cu nan opening show cu banner, dancers y brassband. Den e caso aki e coordinadornan a compromete pa tuma algun gasto ariba nan mes cu nan lo por cubri cu sponsor di e spotnan ariba e

parade-banner. Asina mes e pago colectivo di gastonan a keda un discusion entre e lidernan. Den e discusion aki 3 formula di pago a wordo presenta y ampliamente discuti. Sinembargo, debi cu e lidernan na final di e reunion no a mostra claramente cual formula nan lo a desea pa wordo aplica, e coordinadornan a follow up ariba e reunion, presentando na e lidernan e 3 formulanan aki den forma di e opcionnan: a, b y c, y a pidi e lidernan di grupo pa manda via un sms of un email, cual opcion nan ta scohe. Ora cu a constata cu (dentro di e tempo stipula) ta un paar di lider di grupo so a reacciona (confirmando nan

opcion), e coordinadornan a bay over den averigua cerca e resto di e lidernan si nan a ricibi e documento. Den e averiguacion a resulta cu mayoria a ricibi esaki pero no a haya oportunidad pa reacciona ariba dje ainda. Teniendo cuenta cu esaki, a duna nan e lidernan mas tempo pero tambe a pidi nan pa haci esaki mas lihe cu ta posibel. Sinembargo te awe, drentando e siman di e parada, mayoria di e lidernan di grupo no a reacciona ariba un punto cu mester produci e factor clave pa calcula e contribucion colectivo pa e gastonan di e parada. Pa e motibo aki e coordinadornan a tene un reunion di urgencia pa evalua



e situacion aki. Den e reunion aki a keda señala tambe cu mas cu un lider di grupo no ta muestra ni e minimo boluntad pa scoge un opcion, corda pa nan bay contribui na e gastonan. Mirando e desaroyo aki e coordinadornan a dicidi di bin cu e solucion alternativo cu

suscrito, 3 biaha a expresa den e reunion na SAC, esta cu tur hende ta paga of niun hende no ta paga. Pues pa evita di keda cu e debenan di e parada, e coordinadornan a dicidi di pone e parada na disposicion di SAC caminda niun hende no tin nodo di paga niun cen pa participa.